

UTIP IDIŌK-ŅKPŌ

Ezekiel 18:1-32.

ŌYŌHŌ UKPEP-ŅKPŌ 408

Eke IkpŌ Owo.

IKŌ IBUOT: “Edi ukpŌn eke anamde idiŌk eyekpa. Eyen idibiomke ufen ete esie; ete idinyuñ ibiomke ufen eyen esie; edinen ido edinen owo eyedoro enye ke idem; idiŌk ido idiŌk owo eyenyuñ odoro enye ke idem” (Ezekiel 18:20).

I Edinen Edinam Abasi Ye Owo

Abasi ōtŌhŌ abañā ñke grape ikŌt, Ezekiel 18:1-3; Ņwed Mbon Rome 6:23.

Abasi owut nte Enye anamde ye ete eke enende, Ezekiel 18:4-9; Psalm 15:5; Amos 5:4.

Enye owut nte Enye anamde ye idiŌk eyen emi ete edide edinen, Ezekiel 18:10-13; Leviticus 20:9; Deuteronomy 21:18-21.

Enye owut nte Enye anamde ye eti eyen emi enyenede idiŌk ete, Ezekiel 18:14-19.

“UkpŌn eke anamde idiŌk eyekpa,” Ezekiel 18:20; Isaiah 3:11; Ņwed Mbon Rome 2:9.

Ke ini idiŌk owo ōkpŌnde idiŌk ido esie onyuñ anamde edinen ido, enye eyedu uwem, Ezekiel 18:21, 23-28; 33:12, 16, 19.

Ke ini edinen owo ōkpŌnde idiŌk ido esie akanam ukwañ-ñkpŌ, enye eyekpa, Ezekiel 18:24, 26; 33:11; 2 Peter 2:20.

Israel ekedŌhŌ ete ke usuñ ŌbŌn inenke, Ezekiel 18:25, 29.

EnŌ mmŌ item ndikabare mkpŌn idiŌk ido nnyuñ ndu uwem, Ezekiel 18:30-32; 33:11; Jeremiah 35:15; Ņwed Mbon Ephesus 4:22-24.

SE EKPEPDE EBAÑA

Mme Grape IkŌt

NditŌ Israel emi ekedude ke ufin ke Babylon ekesima nditŌp ñke emi, ete, “Mme ete emedia grape ikŌt ndien edet nditŌ emedoro isuŌ”. MmŌ ekenim ete ke mmimŌ idu ke ufin ke ntak idiŌk-ñkpŌ mme ete mmimŌ. MmŌ isehe esit mmŌ inyuñ idŌhŌ ite “Nnyin ima inam idiŌk, ndien oto idiŌk-ñkpŌ nnyin Abasi ayak eda nnyin esin ke ufin”.

Eti nte edi idiŌnŌ mbiara uduot owo ndimen ubiom-ikpe esie ndori owo efen. Ukem nte Adam okodoride Eve idiŌk-ñkpŌ ntut-utŌn esie, Eve onyuñ emen odori uruk-ikŌt, kpa ntre kpukpru ini ke owo emehe ke ndimen ndudue esie ndori owo edieke enye odude ke itie idiŌk-ñkpŌ. Mbet ubiere ikpe Abasi kpukpru ini enen onyuñ edi ukem-ukem. “Edi ukpŌn eke anamde idiŌk eyekpa mkpa.”

Abraham ama ōfiŌk ete ke Abasi edi edinen, ndien ke ini Jehovah okoyomde ndibiat Sodom, enye ekekpe Jehovah ubŌk ete anyañā Lot, enye eketiñ ntem, “Nsa fo O! ndinam ntem, ndiwot mmŌ eke enende ye mmŌ eke minenke: . . . Nte Ebierikpe ofuri ererimbot! idinamke se inende?” (Genesis 18:25).

Edi Jehovah ama akpa mba ndikŌp ukwañ ñke grape ikŌt emi, ntre ke enye ebe ke Ezekiel etiñ ōnŌ mmŌ ete ke usuñ mmŌ inenke. Enye ete, “kpukpru ukpŌn enyene Mi;” ukpŌn ete ebiet eke eyen. Baba kiet idikpaha ke idiŌk-ñkpŌ owo efen, idinyuñ inyañake baba kiet ke edinen ido owo efen.

Idaha Abasi

“Ndien ke owo enende, onyuñ anamde ikpe ye se inende, . . . ndien midaha ñkpŌ ke ñwo, ada udia esie ōnŌ owo biŌn, onyuñ ada ōfŌn-idem ofuk iferi; . . . eke asañade ke mme ewuhŌ mi, onyuñ onimde mme item mi, onyuñ anamde akpanikŌ; enye edi edinen, iditreke ndidu uwem. Uyo ŌbŌn Jehovah edi emi” oro edi idaha Abasi ōnŌ ete emi enende.

Ndien Jehovah etiñ ñko abañā eyen emi minenke emi ete esie edide edinen. Edieke eyen miduhe uwem eke enende edi, edi owo ñwo, ōduŌk iyip, otuk owo ukut ye ubuene, isanake ñkpŌ

ubiõn iyak ndien ke mbubiam ido esie enye eyekpa: anam otim añwaña ke enye eyekpa ke idiok-ñkpõ esie.

Ndien Jehovah onyuñ etiñ ñko abaña eyen emi enende emi ete minenke. Edieke eyen okutde kpukpru mme idiok ido emi ete esie anamde ndien efehe ndik onyuñ anam kpukpru ewuhõ ye se inende, enye idikpaha ke mme idiok ido ete esie; enye eyedu uwem. Jehovah anam añwaña mmõ ete ke mmõ inyeneye ndibõ ufen idiok-ñkpõ mme ete mmõ.

Idaha emi Jehovah etiñ abaña anam-idiok. Edieke enye edikpõnde mme idiok ido esie onim ewuhõ onyuñ anam se inende, enye eyedu uwem. Enam ye idiok owo emi akabarede esit etiene nte obufa ñkop-uyo esie asañade edi idighe nte ñkani idiok-ñkpõ esie ekedide. Ke ñkañ kiet, edieke edinen owo õkpõnde edinen-,ido esie akanam idiok-ñkpõ, eyenõ enye ufen ke midiok-ñkpõ esie oro ndien akani edinen ido esie inamke ufõn aba inõ enye. Enye eneyene ndifiok ete, ke ikpe, ke akani eti-ido esie idisioho isop ukperedem idiok-ñkpõ.

Nsinsi Ubõhõ

Odu nsu-nsu ukpep-ñkpõ ke ererimbot mfin ete ke ini owo ama õkõtõñõ ntak amana ke enye edi eyen Abasi ofuri ini ke idinyuñ itakke ke nsi nsi enye okpododuk ntõtũñõ ke idiok-ñkpõ, okponyuñ edi enye akpa ke idiok-ñkpõ esie. Mmõ ekot enye “nsinsi ubõhõ”. Ndusuk ete ke mmõ emi ema ekebõ erinyaña ke akpanikõ ndien mmõ efiak edem ke eyetõñõ ntak etiene Abasi mbemiso mmõ ekpa, okposuk mmõ ediyode ke idiok-ñkpõ ke anyan ini. Edi akpanikõ nte ke mmõ ekeme ndifiak ntiene Abasi, edi ndik odu nte ke ndusuk mmõ idikemeke. Nte mmõ esañade esin inwañ-inwañ ukpep-ñkpõ emi, edi se ikpõnde ikan owo ndifiok. Ke Ñwed John 15:1-6, Christ ekpep ete ke kpukpru ñkõk eke miñwumke mfri eyesibe efep enyuñ ebiat mmõ. Mme ñkõk emi kiet-kiet ekeyire ke vine ke ini kiet ko.

Ntõt emi David õkõnõde Solomon, eyen esie, ke 1 Chronicles 28:9, õdõhõ ete: “Ndien afo Solomon eyen mi, fiok Abasi usõ, nyuñ nam ñkpõ esie ke ofuri esit, ye ke ima ukpõñ: koro Jehovah õduñõde kpukpru esit owo, onyuñ otim õfiok kpukpru se ekikere obotde afo ama oyom enye, eyekut enye; edi ama õkpõñ enye, enye eyemen fi õduok tutu amama”.

Mme ufañ Ñwed Abasi emi ekpep ete ke ukpõñ ekeme ndidiõñõ Abasi ke akpa ndien afiak edem onyuñ atak ke nsinsi. Baba idiok-ñkpõ kiet ididukke Heaven. Jesus akakpa man enyaña nnyin esio ke mme idiok-ñkpõ nnyin.

Akpanikõ Emi Odude Ke Ñwed Abasi

Akpan ufañ ikõ Abasi emi mmõ emi enimde ukpep-ñkpõ emi mmõ ekotde nsinsi ubõhõ ke akpanikõ esimade ndikot edi John 10:27, 28, “Mme erõñ Mi ekop Mi uyo, Ami mmonyuñ mfiok mmõ, mmõ enyuñ etiene Mi. Ami nnyuñ nñõ mmõ nsi-nsi uwem; ndien mmõ iditakke ke nsi-nsi, baba owo kiet idinyuñ iwamakere mmõ isio Mi ke ubõk”. Kpeme ete ke Jesus õkõdõhõ ete, “Mmõ etiene Mi.” Ke akpanikõ ke ini ukpõñ afiakde edem akanam idiok-ñkpõ, enye itieneke Jesus inyuñ idighe aba erõñ.

Eyen eka nnyin Jack Robbins emi akakpade ekesima ndidõhõ ete, “Baba owo kiet ikemeke ndiwamare fi nsio ke ubõk Abasi, edi afo emekeme ndisio idem fo mfep.” “ekpeme, enyuñ ebõñ akam, mbak mbufo ediduk ke idomo” (Matthew 26:41). Ke ini ukpõñ õduõde ke idomo onyuñ õduõde esine ke idiok-ñkpõ, enye osio idem esie ke ubõk Abasi, ukem nte Adam akanamde ke ini enye okokopde uyo andidomo ke Inwañ Eden. “Edi eyenyaña owo eke edimede ime tutu osim akpatre” (Matthew 24:13). Nte nnyin itiede ke ñkañ Spirit, ke **utit** mbuba nnyin edibiere me nnyin iyenyene nsi-nsi uwem mme idibõ nsi-nsi nsobo.

“Ke adañemi edinen owo õkpõnde edinen-ido esie, onyuñ anamde ukwañ-ñkpõ, ndien **akpa ke abaña mmõ; enye eyekpa** ke ukwañ-ñkpõ emi enye anamde.” Ñkpõ ndomo kiet iduhe ke ufañ ñwed emi ndinam nnyin ikere ite sia enye ama eke di eyen Abasi ke akpa ke Jehovah ama afiak ada edisin ke otu erõñ mbemiso enye akpa. Ke ebiet eke eto õduõde, do ke enye edina.

Ndien Jehovah õdõhõ ete ke usuñ Imõ edi edinen, edi eke Israel inenke. Kpa ntre ñko ye usuñ mmõ emi ekwõrõde nsi- nsi ubõhõ, usuñ mmõ inenke.

Ndien Jehovah ete ke Imõ idõhõ owo mfiak-edem, ke õdõñ Imõ ndida enye mfiak nsin ke out-erõñ, ndida enye mfiak ndi edieke enye akabarede esit õkpõñ mme idiok-ñkpõ esie. Edieke owo

akpade ke idiok-ñkpọ, emi ediwak edide ntre, enye atak ke nsi-nsi. Jehovah ke ekpekpe ye owo ete yak akabare ọkpọn oburobut ido mbak ukwañ-ñkpọ edinam enye atak. Enye ete, “Enyuñ enam obufa esit ye obufa Spirit esin mbufo ke idem: Koro mbufo edinam didie ekpaña, O ufọk Israel?”

Nsinsi Uwem

“Ọbọñ Jehovah ọdọhọ ete, Ma uwem mi, mkpa idiok owo inemke mi esit, edi idiok owo akam akabare ọkpọn usuñ esie, ndien odu uwem: mbufo, O ufọk Israel, ekabare, ekabare; koro nsinam mbufo ekpekpaña? Afo eyen owo, dọhọ ndien nditọ oruk fo, ete, Eti ido eti owo idinyañake enye ke usen eke enye eduode: ama edi idiok ido owo, enye ididuọhọ ke esit ke usen eke enye akabarede ọkpọn idiok ido esie; ndien eti owo idikemeke ndidu uwem ke eti ido esie ke usen eke enye eduode” (Ezekiel 33:11, 12). Se Abasi oyomde mfin edi ata mme anditiene-Christ emi ema eketọñ ntak emana oro edi mmọ emi ema eketo ke mkpa eduk ke uwem, mmọ emi ema ekesin ererimbot ye idiok-ñkpọ ye ndisime esie, emi ema ekeyet esana ke Iyip Eyen-erọñ. Mmọ enyene obufa uwem. Ema ekpuhọre uwem mmọ. Mmọ idighe aba nditọ andidiok. Mmọ ema ekpuhọ ete-ufọk enyuñ etiene Eyen-erọñ ebiet ekededi eke Enye akade. Mmọ edi mmọ emi edinyenede nsi- nsi uwem edieke mmọ edikade iso ntre esim utit.

Ediwak ke Israel ema eduọñọ ke mben-usuñ enyuñ etak ke ini ekenamde isañ eto Egypt eka Canaan, edi Abasi oyom ete kpukpru owo ke kpukpru ebiet ekabare esit enyuñ edu uwem. “Koro Ọbọñ Jehovah ọdọhọde, ete Mkpa akpa-mkpa inemke mi esit: mbufo ekabare, ndien edu uwem.”

MME MBUME

- 1 Nso ñke ke nditọ Israel ekesima ndike?
- 2 Siak mme nsio-nsio ñkpọ emi Abasi ọdọhọde ete ke edinen owo enyene ndinam.
- 3 Ke usen emi edinen owo anamde idiok-ñkpọ, nso itibe ye enye?
- 4 Ke usen emi idiok owo akabarede ọkpọn idiok-ñkpọ esie, nso itibe ye enye?
- 5 Nso abiaña ukpep-ñkpọ ke ufañ ñwed emi ke Ezekiel afaña?
- 6 Tiñ nte mme usuñ Ọbọñ enende.
- 7 Nnyin isaña didie inyene obufa esit?
- 8 Nso edi ntak emi Abasi ekpede ye anam-idiok ete akabare esit?